



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7 Yangia anidakangma : Tir Yimyim tir_yimyim

tir yimyim TAPAK 8

Linük kümzüka ayutsü
Russia temeden lir: Kim

Iga Swiatek nem ita ka atema
tenokdangba agütsü

VOL. XXII ISSUE NO. 52 (ADOK 52) DIMAPUR AMUNGNÜ (SUNDAY) LUCHII (DECEMBER) 01, 2024 ₹ 5.00

Naga nunger 600 Skill Proficiency Management training agiogo

Kohima, November 30, 2024 (TYO): Naga nunger 600 shi asoshi Skill Proficiency Management for Building and Other Construction Workers Advance Training of Trainers (ToT) 2023-24 Phase-II agiogo.

Iba training ya Nagaland Building and Other Constructions Workers Welfare Board (NBOCWBB)-i Zynorique Initiative Society Nagaland (ZISN) den külemi senotsü teyari agüja ayongzük aser district 6 nung agi.

Taküm March nungi November 2024 tashi Shamator, Noklak, Mon, Tuensang, Mokokchung aser Kiphire district tem District Administrations den yaritepa training agia liasü.

Arishi küm 18 nungi 60 tsüngda Naga lanurtem asoshi training ayongzük agi. Tesüiba nung electrician, plumbing, tiling, RCC, aser stone masonry nung inyaka arurtem asoshi agi ta ZISN-i sangdong ka nung ashi.

Iba multi-skilled training nungsa ToT module nung

temulung agütsü aser tatidang balala agiogo. Iba training metenzük dang tesem shia nungi trainers anana Kohima nung ita asem tashi training agüja liasü ta parnoki ashi.

Training of Trainers (ToT) program ajanga district shia nung pei sasa training agitetsü tashi agütsür ta ZISN-isa metetdaksü.

Training agirtemji Shamator Headquarters nung 100, Noklak Headquarters nung 100, Monyakshu Village nung 50, Tobu Town nung 50, Tuensang Headquarters nung 40, Chingmelen Village nung 30, Chare Town nung 30, Chungtia Village nung 50, Sungratsu Village nung 50 aser Pungro Town nung 100 liasü.

Trainees 600 rongnung tetsür pezü- Tobu Town o Sungratsu village nungi anana dena liasü.

Training takok ngua agiba sülen parnok nem basic tools & materials agütsü aser NBOCWBB welfare scheme nung pre-registered süogo ta ZISN-isa metetdaksü.

Dec 4 nü Miss Nagaland 2024 tetoktepha alitsü

Kohima, November 30, 2024 (TYO): Beauty and Aesthetic Society of Nagaland (BASN)-i December 4 nü Miss Nagaland 2024 ayongzük agitsü.

Regional Centre of Excellence for Music & Performing Arts (RCEMPA), Jotsoma, Kohima nung "Grace and Beauty: The Woman in You" omen kübok iba tetoktepha alitsü.

25 buba Hornbill Festival nung 33 buba Miss Nagaland 2024 ya shilem ka asütsü.

Honibarnü Symphony Cafe, Kohima nung semi finalists 13 teja shiyutepdang December 4 nikongdang 5:00 ako nungi sentong tenzüksü ta BASN president Melekhoto Pucho-isa ashi.

Tetokteperitem asoshi grooming classes aser trainings tenzükogo ta paisa ashi.

"Küm aika lir külen Eastern

Nagaland nungia tetokteper aseme shilem agitsü aliba atema kanga pelar. Eastern Nagaland Women Organisation (ENWO)-i Miss Nagaland nung shilem magitsü lemtet meyipa agienba atema tenüsang agütsür" ta Pucho-isa ashi.

Miss Nagaland 2024 takok korang atema tetokteper 13 lir. Parnokji Chumei C Phom, Nikali K Shohe, Vezotolu Shijoh, Lovikali Swu, Kelülü Dawhuo, Linokali Achumi, Muluveo Koza, Sechenya Semy, Hüralü Dzüdo, Anon Konyak A, Merilo M Kikon, Shyerhunle Seb aser Ayuh W Konyak nunger lir.

Miss Nagaland 2024 atema Rs. 500, Rs. 1000 aser Rs. 2000 indang entry ticket ayoktsü.

Symphony Cafe, D' Cafe nung mesüra December 4 nü sentong agidang ticket alitsü akok ta Pucho-isa metetdaksü.

NFHRCC rongdak senden ka jateper

Dimapur, November 30, 2024 (TYO): NFHRCC-i December 2, 2024 nü Emergency Consultative meeting ka alitsü metetdaksüogo.

Iba senden ya Dimapur nung amenoka aliba kin hohotem den sanen luden züngsemetm aser Young Naga Action Committee on Foothills Road den amentsü

ta NFHRCC-i ashi.

Sendenji anüngdang 1:00 ako nungi NFHRCC base Office, Kher Mahal, Dimapur nung amentsü aser 2 lane Foothills Road construction project indang jembitsü. Anungji nisung ajak medema arutsü mepishir ta NFHRCC ketdangpurtemi ashi.

Nagaland sorkari British High Commission den MoU nung sign sütep



Dimapur, November 30, 2024 (TYO): November 30, 2024 nü Nagaland sorkar aser British High Commission to India tsüngda Memorandum of Understanding (MoU) ka nung sign sütepogo.

Iba MoU ya Chevening Scholarship program atema lir aser Nagaland nung kaketshirtemi dang iba teyari angutsü.

Advisor to the Chief Minister & Investment & Development Authority of Nagaland (IDAN) Chairman Abu Metha aser British Deputy High Commissioner, Kolkata Dr. Andrew Fleming nati MoU nung sign sütep.

Iba sentong nung Chief Minister Neiphiu Rio aser British High Commissioner to India H.E. Linda Cameron na aden.

Chevening Scholarship program ya UK Government indang tongtipang mapa ka lir

aser alima ajungalen recognized fellowship ka lir.

Iba MoU ajanga kaketshirtemi UK university mashii ka nung one-year master's degree azüngba nung senotsü teyari ajunga agüttsü. MoU kübok Nagaland sorkari reserved slots atema sen tera agütsütsü aser iba ajanga Nagaland nungi lennirtemi Chevening global network nung adentsü.

Chevening maparen lateta aliba ama Nagaland sorkar nungi teshimtet nübotem dena mongintemi candidates asadangtsü.

Iba tesentaktep ajanga Nagaland melenshitsü mera ka agir aser rongsenketzung o lokti kanga tejakleni aotsü. Nagaland state renloktsü atema nübo tajungtem nüngdaker aser scholarships ajanga tarutsü lennirtem tajungba anitetsü aser

alima sabang nung Nagaland tenüng metetdaksütsü.

2025 küm tom nungi Chevening Scholarship program tenzüksü aser tejangrar candidate temi Investment & Development Authority of Nagaland (IDAN) den tongteptsü akok.

Tanü Hotel Vivor nung Nagaland sorkari British High Commission aser Welsh Government den yaritepa roundtable discussion ka liogo.

Iba sentong nung Nagaland nung maongkatem aliba aser wadang balala nung international partnerships alitsü lenmangtem aliba lemsatop.

Dimapur nung roundtable balaka ayonga agidang Nagaland nung shishilembartem külemi tayongzükba, maongka aser inyakyim balala aliba shisatokenogo.

Ni tama, ni tuluba aser yimlang yimbang tali tetshiba agi nüburttem piladaksür: Alemtemshi Jamir IAS Rtd

Mokokchung, 30 Nov (TYO): Yimtsüng aika nung tamapur raktepha mesüra tuluba sünüba shisatsü lir, iba jagi tajung masü yimertem ang tali meputep kümdaksür, yamaji yimlang yimbang tali tetshiba ajanga nüburttem tsüngta tepilaba kümdaksür. Iba o ya taoba Nagaland Chief Secretary, Wb. Alemtemshi Jamir IAS Rtd-i Mokokchung Town Longsa Senso Telungjem 66 buba lokti senden sentong nung "tanü tensa nung senso ka teinyaktsü" onük nung ajemdaker jembidang metetdaksü.

Yimlang-yimbang, ni tuluba, ni mezüngpur ta metetshi-i pei yim tajungba kümdaksütsü aser nia senso ka ama yimer atema kechi shilem agi nung ajungtsü, ta tanela tajung nisung shia dak alitsü nüngdaker, aser

iba jagi nütsüng nüburttemji süngjema aser yimjung nung alitsü imlar, ta ashi. Yimjung nung alitsübaji mapa tasak, yangi tapu aika sentaka lir, ta shisem.

Alima ya kanga melenshiogo, tanü technology kanga kara aor aser maparen aika Artificial intelligence (AI) ajanga dang inyakba putu, anungji, tensa den sütepa alitsübaji kanga tongtibang kechiaser temelenshi ajak yagi asenok dak meteta memeteti kongshir, anungji, shisatsü melenshia aintsü renema atatsüla, ta pai bendang lima atalokba tatishitsü kar bener arua lemsatop.

Tanga lima nungbo education nung temulung kanga agütsür, kechiyong alima aintsübaji education dak tuluka nendaka lir, aser tejakleni aoba linüktemi

'technology' tsütsü temulung kanga agütsür. Tanübo akhi education yimya 3Rs nungto masü kakat riju alemdanga tensa den apet angazüksü merangtepha putu lir, ta pai ashi.

Pei yimtsüng nung asenoki school-tem koda anepalur? Tanü repringdangra yim teimba ka nung pei chirnur education bushitsü atema pei yimtsüng toktsür jila bushia oteper, iyongji yimdam school azünger mali küma aor aser yim apua akümer. Asenoki education jenjanggi angateta yangji temulung agütsütsüla, ta ajungshi. "Education yayim junga lira yimertemi yim toktsür maotsü, anungji, tesayurtema mulungsentsü melenshitsüla aser tensa den sütepa sayutsü merangtsüla", ta shisem.

(Maneni tapak 2 nung...)

Kisama nung Legal Services Stall lapokogo



Dimapur, November 30, 2024 (TYO): Gauhati High Court, Kohima Bench, Judge, Justice Budi Habung-i 25 buba Hornbill International Festival atema Legal Services Stall lapoktsüogo.

November 29, 2024 nü Kisama Heritage Village nung Justice Budi-i Nagaland State Legal Services Authority (NSLSA) indang Stall lapoktsü.

Iba stall ajanga ozüing tsütsü teyari nüngdakertem yaritsü aser anogo 10 nü tsüingda maparen inyaksü mapang peria dang lir. Anungji panel lawyers-i stall

nung tangar yariba dang masü saka legal literature agütsütsü ayongzüker, ta pai ashi.

Legal services-isa court marriages aser tanga procedures nung yariteptsüla ta Justice Habung-isa metetdaksü.

Iba sentong nung NSLSA Member Secretary, Neiko Akami-ia activities aser services indang osang lemsatöp.

Legal Services Stall nung nisungtemi legal services angati angutsü. Iba stall nung Affidavits agütsütsü, legal Aids & representation, Legal Literature

& booklets, Legal counselling aser advice amala teyaritem angutsü.

State aser District Legal Services Authority nungi panel lawyers dak alia N Longshithung Ezung, NJS & Chief Judicial Magistrate aser Secretary Kohima DLSA, Phuleto Yeptho, NJS na adentsü.

Kisama nung anogo 10 nü benjung nung state legal aser District Legal Services Authority nungi panel lawyers-i Legal Services Stall ketdangtsütsü.

Mkg nung ASHA tem atema training ayongzüka agi

Dimapur, Yimpoksüi/November 30 (TYO): National Oral Health Programme (NOHP)-i ayongzüka Mokokchung nung Urban ASHA tem atema Oral Health koda tongtibang iba dak sendakba nung anogo ka atema training sentong agiogo.

Training ya November 28 nü Conference Hall Chief Medical Officers Office, Mokokchung nung ayongzüka agi, aser Dr.

Keneitheja Dental Surgeon IMDH aser Nukshiwati Consultant NTCP na shisalen sayur liasü.

Dental surgeon IMDH Mokokchung Dr. Keneitheja-i, oral hygiene, diet, tobacco cessation amala dental tashidak dak sendakba nung tangazükba agüja community level nung ASHA tem tinyaktsü aser khuretem indang lemsatöp.

Paisa, school tanurtem

anogoshia tepu meyutsü atema ajungshitsü asoshi anganwadi nung inyakerkem aser school tesayurtem den sendaktepa inyaksü ajungshia liasü.

Kasa mapang nung NTCP Consultant Nukshiwati-i, ASHA tem dang moko achiba ajanga temang nung tashidak balala adokba indang nüburtem aser talisa lanurtem nem tangazükba agütsütsü aser COTPA 2003 indang metetdaksütsü ajungshia liasü.

Hornbill Festival atema State Level Control Room ka amenokogo

Dimapur, November 30, 2024 (TYO): 25 buba Hornbill Festival tiptema agitsü atema Nagaland Chief Secretary lenisüba kübok State Level Control Room ka amenokogo.

Iba luden nung Chief Secretary, Dr J. Alam, IAS (Chairman) aser ACS, Finance Sentiyanger Imchen, IAS (Co-Chairman) lir.

Tanga züingsemtemji Commissioner & Secretary, J&L Kikheto Sema IAS, Home

Commissioner Vyasan R IAS, Commissioner & Secretary,, W&H Kesonyu Yhome IAS, SS (Home) Limasunep IPS, Secretary I&C Shanavas IAS, Secretary (TPT) Secy. (Home) Robert Longchari, Orenthung Lotha, Jt. CEO, NSDMA Johnny Ruangmei, Joint Director IPR, Asangla Imsong aser Dy. Director, IT Daniel Krocha nung lir.

State control room ya 24x7 mapa inyaksü aser November

27, 2024 nü Chief Secretary menden ser mezüingbuba senden menogo.

Senden nung Committee-i Hornbill Festival amongdak Kisama nung transportation aser traffic tebilemstütem lemsatöp.

Senden nungsa line department ajaki amaliteptsü aser logistics, security arrangements, cultural performances, vendor managements o crowd control nung yariteptsü metetdaksü.

MP Supongmeren-i Nagaland Statehood day salem abener

Dimapur, November 30, 2024 (TYO): Lok Sabha & NPCC President S. Supongmeren Jamir-i Nagaland Statehood day tenüing nung Nagaland nung senso ajak den salem lemsatöpogo.

"December 1, 1963 nü Nagaland ya India kübok state ka kümer küm 61 abensar aser iba anogo nung asen state tenzükertemi mapa inyakba atema peladi aser tetushi agütsüdi" ta Supongmeren-i

ashi. Nagaland state akümba ya asentzü aser nüktzü ajanga lenmang lapok. Tanü süngjang tajung atangba atema aser asüing tarutsü tajung atema asenoki Oboula nunger dang peladi, ta paisa ashi.

Asenoki iba alizüing atongba atema benjungtepdi aser asen state renlokda tsütsü atema tenangzüka agishidi, ta MP Supongmeren-isa ayongzüker.

Sentilong Ozüküm-i züluba Love Like This kaket sayaogo

Mokokchung, November/ Yimpoksüi 30 (TYO): Tanu Sentilong Ozüküm-i züluba , Love Like This" novel kaket First Rain, Kilem, Sangtemla Ward 73G, Mokokchung nung sayaogo.

Sentilong Ozüküm-i züluba Love Like This novel kaket ya Sentilong Ozüküm Queen Mary Higher Secondary School nung azüing dang pa tesayur asüba Ronojyoti Roy-i sayatsü aser Ronojyoti Roy ya tang kasa school nung facilitator teinyakdak lir.

Kaket sayatsür külen Ronojyoti Roy-i olen tatsüka ajanga lemsatöp dang kaket tajung ka züluteta adoktettsüji mapa kanga dang tasak saka Sentilong Ozüküm-i Civil Service mapa tulu kokteta inyaktetba den külemi nübur ajangzüktetsüsa kaket zülua adoktetba asoshi tenüngsang agüja ashi.

Kaket zülur Sentilong Ozüküm-i züluba kaket nung keta alibatem telok den rasaa lemsatöp, iba den kaket zülur aser Wt.Maongienla Assistant Professor Department of English, Fazl Ali College tenati kaket nung zülua aliba onüktem



Sentilong Ozüküm

rasaa lemsatöp sa sensaksembamapang agiba ajanga tesentepertemi kaket nung alibatem tejangjaba nung angateta liasü.

Sentong nungsa Jonathan S Singsit, Assistant Professor Dept. of Environmental Science, Yingli College aser Dr. Bendangrenla Longkumer nungeria shilem balala agia liasü.

Sentilong Ozüküm-i tang züluba Love Like This kaket den ano taoba mapang nunga item kakettem ya zülua adoka lir "Campus Blues" –(2010), "Sincerely Yours" (2017), "Dreams & Chaos" (2020), aser "The Case of Longti Village" (2021), aser "Teacher Man" (2022).

Ni tama, ni tuluba aser... (TAPAK 1 NUNGI...)

Paisa rongsenren tsütsü onük kar lemsatöp dang, Nagaland nung ali peria kar saka aluyimer mali, rongsenji aluyimba nung ya amendaka lir, anungji, ali dangi meyiptsüla, saka akhi yimya nung masü tensa den sütepa temelenshiba nung inyaksangshitsü nüngdaker, ta paisa aluyimba nung temulung agütsütsü asoshi tayongzüka agütsü.

Yimdak yimtsüing terenlok asoshi sarkari mapatong jenti inyaker saka asenoki sarkar dak dang imlar odang yutsüra, item mapatongtemji takok mangutsü, anungji, "alar shisatsü melenshidi", joko pei sasa inyaksü mulungtetdi. Sarkar dak dang meimlai pei yim lenmanga anepalutsü asoshi paisa shisem.

Paisa sobaliba nung temulung agütsütsü atema onük kar ashidang, sobaliba nung ya tapu aika sentaka lir, anungji, lanu putu nem asen sobaliba tajungtem angazükda tsütsü merangtsüla, ta ashi. Meranga

inyakba, yimyayimbong/jakla tajung, awashi metetba aser sobaliba tajung kechisa lir, itemji mamatoki akangshia wazüka ayutsü asoshi paisa ayongzüker.

Politics tsütsü onük kar lemsadang, tanü Nagaland nung politics tapu ana lir – ka telungpur aser kaji temapur. Telok anapronglai oset/rongsen (materialistic) dak dang temulung agütsüba ajanga tanü telungpur telok aika küma odar, aser temapura "opposition-less government" yanglur odar. Democracy inyakyim nung opposition-less sarkarji kecha tetezü maka aser tim masü. Item ajakji talisa Naga nungeri rongsen dak dang ranglokba ajanga adokba lir, aser rongsen dak dang amangba agi tangatetba samadaksür, ta ashi.

Politics ajanga dang alima melenshidaksür, anungji, alima melenshitsü asoshi nübur tangatetba melenshitsüla, pungmang aser mangdang tejangja akatsü nüngdaker, ta paisa lemsatöp.



Wokha District Urban Development Agency (DUDA)-i Deendayal Antyodaya Yojana - National Urban Livelihood Mission (DAY-NULM) kübok November 29, 2024 nü Self Help Groups (SHGs) atema Skill Training Programme & Awareness Session ka agidang tangokba noksa angur. Iba sentong nung Wokha ADC & DUDA Chairman, Renbomo Ezung-i DUDA indang indang osang lemsatöp aser SHG products takok ngua yokyayojimsü shisalen sayu.



November 30, 2024 nü Madhubani, Bihar nung Union Finance Minister Nirmala Sitharaman-i Central sorkar schemes balala kübok beneficiaries nem cheque agütsü dang tangokba noksa nung angur.

Bangladesh nung Hindu nunger tekülem ki asem amak

New Delhi, Yimpoksüi/ November 30 (Agencies): Hokolbarnü Bangladesh kübok Chattogram nung lokti kati Hindu nunger tekülem ki asem amak.

Chattogram yimti nung Hindu nunger putir ka apuba sülen Hindu nungertemi longkak aita tensa tamajungba kümogo.

Bangladesh nung Hindu nungertem anema inyaker aser India nunger wako mezüngmeshiba noksatem prokshiba ajanga tensa ano tamajungba kümogo.

Kolkata nung aliba hospital ka nungbo ketdangsertemi Bangladesh nunger shirangertembo meyaritsü ta shiogo aser India nung right wing lenirtemia Bangladesh nung ketdangsertem dang Hindu nungertem kümzüksü atema inyakang, ta mepishiogo.

Taoba mapang ISKCON Bangladesh nung züngsem, Chinmoy Krishna Das-i Bangladesh nung linük wako mezüngmeshi, ta pa nem tai tongloksüba sülen Hombarnü puogo; pai bail temepishiba agütsü saka magizük.

Pa apuba sülen Bangladesh yitmtiba, Dhaka aser Chattogram na nung Hindu nungertemi longkak ait tenzüka liasü.

October 30 nü agütsüba ken o nungji Das densema nisung 19 tenüng densema lir. Chattogram kübok New Market area nung sentong ka agidang parnoki Bangladesh nung linük wako mezüngmeshi, ta parnok nem tai tonglokja lir.

Hokolbarnü India sorkaria Bangladesh nung interim sorkar dang linük nung Hindu nunger densema nütsüng ajema aliba nüburttem aser parnok indang tekülem kitem kümzüksü atema inyakdaksüner, ta mepishia

metetdaksüogo.

Hokolbarnü Bangladesh kübok Chattogram yimti nung lokti tulu kati yimyim ayima Hindu nunger tekülem ki asem amak. Osang angazükba agi, Hokolbar nikongdang 2:30 ako meta Harish Chandra Munsef Lane nung aliba Shantaneshwari Matri tekülem ki, anasa aliba Shoni tekülem ki aser Shantaneshwari Kalibari tekülem ki amak.

Nisung noklang aikati yimyim ayima tekülem kidang lungro onloksü aser ibaji ajanga Shoni tekülem ki densema tekülem ki asem kikümbang raksa, ta osang ka ajanga metetdaksü.

Kotwali Police Station nung ketdangser Abdul Karim-i, atangji lokti jagi tekülem kitem raksatsütsü merang, ajisüaka telok ana ajurutepa long agi ontepba ajanga tekülem kitemjibo tera dang raksa, ta metetdaksü.

Bangladesh nung Hindu nungertem anema inyakba anema north Kolkata kübok Manicktala kiyong nung aliba hospital katibo parnok indang hospital nung Bangladesh nungi aruba shirangertem meyaritsü, ta sangdongogo.

Osangbener den jembidang JN Ray Hospital nungi ketdangser kati, Bangladesh nungertemi India nunger wako mezüngmeshibaji onoki magizükteter, anungji iba hospital nung Bangladesh nunger shirangertem magizüksü, ta metetdaksü.

JN Ray hospital nung ketdangser, Subhranshu Bhakti-i, "Asen linük wako mezüngmeshiba onoki nguogo, anungji Bangladeshi nunger shirangertem magizüksü atema onoki telemtetba agiogo. Parnok nüchiso angutsüsa India-i kanga

tongtibang shilem agiogo, ajisüaka parnoki India nungertem anema inyakba asenoki kuli süa angur. Tanga hospital temia onok pusemstü aser kasa telemtetba agitsü onoki imlar," ta metetdaksü.

Bengal BJP lenir kati, "Bangladesh nung Hindu nunger shishilembartem sendoker. Ni West Bengal nung alirtem densema India nungertem dang Bangladesh nung reshikangshi ajangshiba Hindu nunger pusemstü ayongzüker. Interim sorkar amenokba sülen tesüiba ita ishika tsüngda Bangladesh tesem balala nung Hindu nunger amakba aser amokmerenba tatalokba osang aika lir, talisa tesüiba anogo ana tsüngda item ama tatalokba ano tali bulua kümogo," ta metetdaksü.

Bangladesh nung India nunger linük wako mezüngmeshiba aija pai, "Asenok atemabo sentsü asem aketba wako akhümket ya tulutiba. Asenoki tanga linüktem nüchiso akhümtsübur, yamaji tanga linüktemia asen linük akhümtsübutüsüla. Bangladesh sorkari tim teinyaktsü inyaktsüla mestüra tarutsü nung iba linük denji shishilembaba tapu ajak anentsü," ta paisa metetdaksü.

Honibarnü Rashtriya Swayamsevak Sangh (RSS)-ia Bangladesh nung interim sorkar dang Hindu nungertem amakba nokdangang aser tangsa ISKCON putir, Chinmoy Krishna Das chiokang, ta takhangba agütsüogo.

RSS general secretary Dattatreya Hosabale-i sangdong ka ajanga India sorkar dang Bangladesh nung Hindu nunger amakba nokdangtsü atema maneni inyakang, ta mepishia metetdaksü.

Tzü-mopung lendong ama BJP-i temzüng memetet: Priyanka Gandhi

New Delhi, November 30 (Agencies): Honibarnü BJP aija Congress lenir, Priyanka Gandhi Vadra-i, yimtenren tongbang nung ruling party-i democratic telatetbatem memetet, ta ashi.

Taküm July ita nung Kerala kübok Wayanad nung anentsüh lendong atalokba den BJP medemdanga lai, alima tzü-mopung lendong ama BJP-i temzüng kübok malir, ta ashi.

"Tanü onoki (BJP tsütsülen nungi ajuruba) yimtenren tayongzükbatem ya anentsüh amai lir. Temzüng mali. Kuli mali," ta lai ashi.

"Ruling party indang yimya, BJP-i democratic telatetbatem memetet," ta lai ashi.

Kerala kübok Mukkam nung lokti senden ka nung jembidang lai item o ya metetdakja liasü.

Iba sentong nungji tedi aser Lok Sabha nung Opposition lenir, Rahul Gandhi-a liasü.

Tawa Priyanka Gandhi Vadra-i Wayanad Lok Sabha menden by election nung takok anguba sülen lai anogo ananü Kerala semdang.

Laisa Wayanad nung nüburttem dang, "Parliament nung ni nenok atema ola adoktsü, nenok tebilemstü onüktem bentettstü atema ni merangtsü. Ni tang nungi tenzüka tatembang tashi anogo shia nenok atema nokdaksü," ta ashi.

Brihostibarnü lai Parliament nung MP tenangzüka agia liasü. Lai Kerala tsürttem saree ka agir, teka ajichilen linük temzüng kaket ka amer Hindi oshi nung MP tenangzüka agia liasü.



November 30, 2024 nü Kolkata nung Central sorkari benokba Waqf (Amendment) Bill anema longkak aitba sentong nung TMC MP, Kalyan Banerjee-i jembidang tangokba noksa nung angur.

Maharashtra nung December 5 nü sorkar tenangzüka agitsü: BJP

New Delhi, November 30 (Agencies): Maharashtra nung tang tashi Chief Minister menden atema telemtetba magiteti lia Honibarnü Maharashtra BJP Tir, Chandrashekhar Bawankule-i, December 5 nü sorkar tasenba tenangzüka agitsü, ta sangdongogo.

Tenangzüka agiba sentong nungji Ato kilonser Narendra Modi, Union Home Minister Amit Shah, Union Minister tem aser BJP-i yimsüsüba state tem nungi Chief Minister tem aser tongti ketdangsertem aika adentsü.

Tenangzüka agiba sentongji nikongdang 5:00 ako nung Mumbai nung aliba Azad Maidan nung ayongzüka agitsü, ta BJP lenirisa metetdaksü.

Tawa Maharashtra assembly election nung BJP, Eknath Shinde-i aniba Sena aser Ajit Pawar-i aniba NCP party tem lokteper toktepa takok angu. Eknath Shinde-i maneni Chief Minister inyakner, ajisüaka BJP-i par party lenir Devendra Fadnavis chief minister shimtsü tebilemba lir, ta osang angazüker.

Tang tashi Chief Minister tenüng mesangdonger. Hokolbarnü senden ka ayongzüka liasü saka Eknath Shinde-i sendenji thinentür par yimdaki ao.

Eknath Shinde par yimdaki aoba ajanga Chief Minister menden atema o lemteptsü aliba thinenba dang masü saka portfolio alemtsü aliba-a thinen.

Brihostibarnü Eknath Shinde den BJP lenir Devendra Fadnavis aser NCP lenir Ajit Pawar nungeri Delhi nung Union Home Minister Amit Shah par kidang ajurua senden menogo, ajisüaka iba senden nungjia telemtetba kecha magiteti liasü.

Honibarnü Maharashtra Deputy Chief Minister, Ajit Pawar-ibo, chief minister tasenbaji BJP nungi asütsü aser Mahayuti teloktep nung dena aliba tanüngba party ana nungji deputy chief minister ana shimtsü, ta metetdaksüogo.

Pawar-i, "State nung BJP nungi chief minister ka alitsü aser Mahayuti teloktep nung tanüngba party ana nungji Deputy ana alitsü. Tenangzüka agiba sentongji December 5 nü agitsü," ta ashi.

Ano külen Eknath Shinde nem CM menden magütsüyonga pai aniba Sena teloki state home minister aser general administration portfolio aginer, ta osang ka ajanga metetdaksü.

BJP lenir Fadnavis Deputy Chief Minister inyakdanga pa nem Home Ministry agüja liasü.

Eknath Shinde-isa Finance Ministry aser Speaker menden-a par party nem agütsüdaksüner.

BJP-i Sena nem item tongtibang portfolio magütsüra Shinde-i aniba Shiv Sena-i sorkar nung madentsü saka BJP-NCP sorkarbo temalen nungi pusemstü, ta party telung osang ka ajanga metetdaksü.



November 30, 2024 nü Jantar Mantar, New Delhi nung All India Democratic Students' Organisation (AIDSO)-i ayongzüka kaketshirtemi National Education Policy (NEP) 2020 anema longkak aيتدang tangokba noksa nung angur.



TIR YIMYIM YIMOBILEM (EDITORIAL)

DIMAPUR AMUNGNÜ, DECEMBER (LUCHII) 01, 2024

Yisu ajuruba

Nisung balalai mapang balala nung yimya balala ajanga Yisu ajurur. Nisung kari bushia oa ajurur, nisung kar dangibo Yisu arur aser nisung karbo tangar ajanga ajurur. Aji oda, koba tia nung aser koba yimya nung ajururdir ajuruang, Yisu ajururtemji tia taka. Yisu ajuruba agi tasürtem shia arur, nükpokeri angur, tsüngtsükeri jajateter, temenen tanüla agi pur kangshia alirtem salatsür aser shirangertem aneper. Yisu ajuruba agi temenen taidok angur aser teti atema Tsüngrem chir akümer. Aji oda, Yisui kümzükter ta asenok ajaki meteta lir. Ajisüaka, asenok dak tashimait kaji asenoki Yisu mebushir aser Yisui bushidanga asenoki Pa magizüker. Anungji ano, tangar ajanga Yisui asenok ya Pa dangi arudaktsüner saka asenoki iba taochi lenmangjia aiben mereprangteter. Aiben, tangar ajanga lenmang balala len nungi Yisui asenok ajar ser nung asenoki mangatetba ajanga Tsüngrem nungi taochi aser temoatsü magizükteti asenok temenen lar kümer shisaboluseta asenok alir. Tanü asenok den yangi kanga tesempatsü mapa inyaka senzüba temenen tsür kati tangar ajanga Yisu ajuruba otsü tejen ka lepshia lemsatepner. Laji Yohan tapu 8 nung shia aliba nüktapangtatsürla to lir. Anepdang yakta ka, Olive tenem nung tenla kidang Yisui nübotem dang sayutsüngia aliba mapang ka, Farisi aser Tezülurtemi nüktapangtatsürla ya nüktapangta benschia lia pur, laji Yisu dangi anir aru. Atangji, Farisi aser tezülurtemi nüktapangtatsürla Yisu dangi anir arubaji temenen taidok aser tekümtet agütsüdaktsünüa anir aruba masü. Parnok nükjidongjibo Yisu dak tai aputsü asoshi liasü. Ajisüaka, iba nüktapangtatsürla asoshibo Tsüngremer sentong balaka liasü. La nem taidok aser tekümtet agütsütsü asoshi Tsüngremi Farisi aser tezülurtem amshi. Iba anogo nung to la nüktapangtaya lia Farisi aser tezülurtemi mapu asünungbo, ano tang tashi Yisu majurui nüktapangta benschia senzüa lila ta kenkenbo temulung nung tipmedemi bilemer. La ya nüktapangtaya lia apu nungji, la den tebur ka dena liasü ta asenoki angateter. Ajisüaka, kechiba Farisi aser tezülurtemi kuli asütsü atema danga paji mapu aser kechiba tetsürla denji külemi Yisu dangi paji anir maru ta ano temulungjang nung tasüngdangba ka arur. Nüktapangta benschiba mapaji tebur atemabo tai masü saka tetsür atema dang tai asü ? ta asüngdangtsüsa adoker. Atangji, nüktapangtaba mapaji ajak atema tai saka iba anogo ya nüktapangtatsürla atema dang Yisui ajaba anogo ka asü südi. La pur Yisu dangi anir aodanga lai ola madok. Lai la medentsü memerang. Lai la temenen nempangtsü mebilem. Tanü tensa yimten mesüra lokti nung lenirtem kari tetsür ka tebur ka den nüktapangtaya ngur apu nungbo, ashiko tetsürla jagibo tebursangi tashiyim agi la raksatsütsü meranga liasü ta la temeden bushia nokdakla ta kenkenbo bilemer. Ibaji mesüka tangar ajanga Yisui kümzüktsü ajar ser nung, asenoki asen tanurtem machimajemtsü chiajema lia tangari apudang asenoki parnok temeden indang jembir aser parnok apurtemjiang aitsür. Ibayongji, asenok tanurtem aser apuani aika Yisuibo ajurunüseta ajar ser nung asenoki nokdangba agi Pa majurutet aser taochi mengutet samadagi. Nüktapangtsürla nüktapangtaya lia apuba ama, asenoka aiben asenoki tai inyaka lia tangari jakdaka apur, saka asenoki tai menangzüker aser memelenshir, anungji Yisu majurur. Asenoki asenoksasa shitak inyaker asü tai inyaker-ar meteta dang lir, saka asenoki memelenshiteter. Iba ama mapang ka nung ajungbena ka tangar ajanga aseni Yisu ajurutsüsa tai benschia lia apur. Iba ama mapang nung tangar dang mejashii Yisu ajurutsüba mapang tajung ta bilema, ajemajema Yisu tsüngdang oa nokdakra, nüktapangtala dang ashi ama, Yisui asen maitsütsü. Pa tsüngdang taidok aser taochi angutsü aser tekümtet ngur pelashishia alitsü.

OLEMSABANG

KHRISTMAS SALABA: KHRISTANTEM ASOSHI TEKÜMDANGTSÜ

~ Meyu Changkiri

Okila

Kanga dang süngzüka alitsü merangba putu ka nung, Khristmas benjong ya aiben shishilembaba tangatetbalen meyipa aoba angur. Tanga mapang dang nungi alia, Khristmas mapang sempet aliba, sempet agütsütepba, ki sobutsü enokba, chiyongtsü tapu balala renema benjongtepba ya koda? Khristmas ya atangji medemertem, temeim kinungertem ajurutepba pelateptsü mapang tajung. Saka aiben Khristmas tanela tetezü tali tarokba bushitsü melena, longsotepba benjongtepba nem kokdaktsür. Khristmas mapang sempet tajungtiba alia agütsütsü aritep dang, Khrista ajanga bener aruba teyimla, yimjung, aser tepela osang samadaktsüba kuli aika dang lir.

Tanü Khristmas Tiatensa

Khristmas mapang nisung aika mazüngi inyakteper. Shishilempartem asoshi Khristmas mapang rongsen züintsü meranga inyakteper. Iba ama mapang Khristantem mazüngi inyaktepdang, kar asoshi rongsen achaayangba nung timtem ajurur. Kechiyong rongsen lalushibunga amshiba nung tebilemstü aser timtem aika sendaktepba lir. Khristmas tetezü angateta temeim mapa inyaktsü melen, ki sobutsü toktepa sobuba nung mapang aser rongsen endoker. Tanga mapang dang nungi alia chiyongtsü tapu balala renema chiyongtepa, aser molamoshia benjongtepba ajanga shidakba Khristmas tetezü magütsür. Iba maparen jagi aiben Khristmas nükjidong nungi pila odaktsür, aser temeim agi molungsoa agütsüba aser yaritepba ajema akümer. Iba ama mapang temeim, tatok agütsüba, aser ajemaluba indang tanela tesayubatem ajema akümstü ana nung lir. Tsüngrem taochi agi Yisu Khrista meimchir rong nung asoba aser Khristmas mapang amangbapur mazüngi inyaktepba ya medemdangra, temulungjang nung tasüngdangba aika arur. Khristantem yagi tama tazütsü agi dang inyaker asü, Khrista alimai aruba nükjidong angateta inyaker? Item alima tatsüba aika liaka, shidakba Khristmas tanela tangatetba nung ano aikati meyipa yanglushitsü meranger. Nüngdakbapur yariba, maka maitertem nem molungsoa teyari agütsüba, aser temeim mapa balala inyakba ajanga item alima tatsüba nungi pilaa alitsü tashi tulu agütsür.

Kija aser arogotemi iba ama mapang nung kibong telongjem, amangbapur temeim aser tashi maitertem yariba nung rangloka Khristmas tetezü ano tali tarokba nung mongtettsü koka lir.

(Maneni asüng adok nung...)

TEMEPISHIBA KA

~ S. T. Yapang Lkr, Kohima.

Mamangertem dang Christmas tenüng nung star mayoktsüla iba den Christian masüba dokantem dang Christmas decoration inoktsü majungshi tajungba. Kiyong/ yimden amalai dokan shia petinu amala yanglur temzüng agi ayokdang mamanger timbai alitsüsa akümer, asenok Nagalima atena oa alirtem dang tatishitsü agi Druja Puja tenüng nung süngyanglu kaka temzüng agi yokyonga aru nung mesüra ki shia süngyanglu kaka ayutsü temzüng ka yanglu nung asenoki maginütsü.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngeru angateta agütsü mepishir

CEF-i tanur million 12 den Khrista osangtajung lemsateptsü



Child Evangelism Fellowship (CEF) indang Christmas Party Club sentong ka nung tanurtemi shilem agidang tangokba noksa nung angur.

November 30, 2024: Tanur-lanurtem aika yimsü nungi talangka pilaba mapang nung interdenominational telok kati taruba Khristmas mongpu nung tanur aika den Khrista osangtajung lemsateptsü aser parnok melungjang nung Khrista temeim apuoktsütsü nukjidong nung campaign ka tenzükogo.

Child Evangelism Fellowship (CEF)-i Christmas Party Club campaign kübok tanur million 12 den Khrista o s a n g t a j u n g lemsateptsü. Parnoki Arogotem dang Christmas Party Club ayongzüka agitsü atema mepishir.

1937 küm tentetba Child Evangelism Fellowship-i tanurtem Khrista metetba nung anitettsü atema Khristantem nem training agütsür.

Study balala ajanga bushitetba agi, tanü-asüng tanur-lanurtem aika yimsü nungi talangka pilaogo aser Tenla kidangi aoertem kanga ajema kümogo.

Osangbener den jembidang CEF Acting Vice President of Administration, Fred Pry-i, "Tanü alima nung asenok meketa kechi atalokdir atalokaka Laishiba ochi ya tanü tashi tapet. Ibayongji Christmas Party Clubs lemsatepba ya tongtibang aser chichiba Khristmas tetezü angatettsüji tongtibang ta onoki bilemer," ta metetdaksü.

Taküm CEF indang nukjidongji volunteer 348,000 nem training agütsütsü aser Christmas Party Club 367,000 ayongzüka agia tanur million 12.6 den

Khrista osangtajung lemsatepba den külemi chichiba Khristmas angatetdaksütsü atema lir.

Christmas Party Clubs ya November ita nung tenzük aser Khristmas anogo tashi agitsü, ano khenkhenbo parnoki iba sentong ya January ita tashi-a atsülanga agir.

CEF-i Arogotem nem ken, temelung agi azüngtsü Lai tekongtem, Bible studies aser review games densema club activities balala agütsür.

"Light of Life" lesson ajanga tanurtem dang Tsüngrem chir asoba sangdongtsü atema Tsüngremi tesangwa amshiba indang tesayuba agütsür. Iba lesson ajanga pelpei tesangwa yadaksütsü aser pei kibong aser medemertem den Tsüngrem O lemsateptsü atema tanurtem nem tesayuba agütsür.

Pry-i, "Kodang asenoki sempet indang jembidir tanurtemi ibaji Khristmas den sendakteptsür. Iba sülen nai tanurtem dang parnoki agizükba sempet tajungtibaji kechi? ta asüngdangang. Iba mapang nungji parnoki shisadanger aser Tsüngremi parnok meimba parnoki angateter, aser ibaji ajanga nisungtem atsüer arur," ta ashi.

Yaküm Khristmas mapang nung CEF staffs aser volunteer temi Christmas party club 295,000 agi aser alima tesem balala nung tanur million 9.1 den Khrista osangtajung lemsatepba liasü. 2022 küm nunga parnoki club 169,000 agi aser tanur million 6.2 den Khrista osangtajung lemsatepba liasü.

CEF-isa 2023 küm

training seminar 12,900 agi aser volunteer 277,500 nem training agüja liasü.

Pry-i ashiba agi, volunteers jagi pei linük nung ayongzüka Christmas Party Club nung yariteper aser CEF nung inyakertermi parnok nem training agütsür.

Alima tesem balala nung CEF staff 3,600 shi lir aser parnok aika linük balala nung aliba refugee centers nung inyaker.

Christmas Party Clubs ya Khristantem reshikangshiba linüktem nunga ayongzüka agir, ibayongji Organization indang mission takok angutsü atema sarasadem ya kanga tongtibang, ta CEF administrator-isa metetdaksü.

Linük aika nung Khristantem reshikangshi tia nung lir, ibayongji onoki kanga sarasademer, ta pai ashi.

CEF-i '50 Days of Prayer' ayongzüka agir aser iba ya November mezüng anogo nung nung CEF den külemi shilem agitsü atema alima tesem balala nung nisung 400 dak talii sign süogo, ta paisa metetdaksü.

Pry-isa, CEF mission angateta nisung aikati tenla tajung agütsür; yaküm nisung katibo CEF nem dollar sen 500,000 tenla agüja liasü, ta metetdaksü.

"Tanü asenoki kodang alima ya reprangdangdir nai meteta aliba nisung aikati mapa tajung inyaka nisungtem yarir, tanurtem yarir, chiyungtsü aser süoshi agütsür, saka nisung ka tanela teti atema kümzüktsü atema nai koma bilemer?" ta Pry-i asüngdang.

ANO GO ABEN TSÜNGREM DEN

TAMASHI MERUMERUBA

Tajangzük asoshi teka yia merumeruba nisung ajak lenmang yamaji. Iba jagi pei meyong takümü dang agia adoker. ~ Apijemtsü 1:19

Solomon shisataka chubai apijema jembiba oji meimchir shiai pei kechi inyaker aji angatettsü aser metettsü indang jembida. Tsuraburtemi pei chirtem dang shitakba lenmang sayutsu ajungshi. Aser kasa tanurtemia tsuraburi aniba lenmang nung jajatsüla ta ajungshi. Kodanga tamashir aser tamajunger lenmang nung mejajatsü sayu o ashi. Kechiba süra parnok tetsüng temenen leni asemer, aser azütokshitsü ariteper, aser pei tajangzük asoshi tiyazü teka merumerua inyaker. Item asoshi takümü mita alitsüla, Tsüngremer tashi temeteti takümü mita alitsü kanga nungdaker.

Kodang asenoki nisung kar ochi mashiba indang jembidir item purtemji merumeruba nisungtem ta melamelaa ajitettsü akok. Merumeru shisatsü denji teti agia ochi mashi ampangyim, pei asoshi dang bilemba anidaka lir. Yisu Khrista dak amanger takümü ka mesüra kibong ka dak kodang iba merumeru nung tsükdir, item purtem dang shisa maka tamashi nisung ta ajatsü kecha terata maka. Adianu, "merumeru"nungi jenbua alitsüang azükdi.

Assam Christian Forum-i Khristantem temeden kümzüktsü akhanger

November 30, 2024: Assam state tesem ajaklen Khristantem aser Arogo kiojentem anema inyakba kanga bulua akümba atema tebilemstü kaa Assam Christian Forum (ACF)-i sorkar dang Khristantem temeden kümzüktsü atema tangsa inyakdaksüner, ta takhangba agütsü.

November 28, 2024 nü Guwahati nung rongdak senden ka amenba sülen osangbener den jembidang ACF-i, Khristantem anema bulua inyakba ajanga Khristantem rongnung tetsübu tensa ka aiddaksüogo, ta metetdaksü.

ACF otongdar, Allen Brooks-i, state nung Khristan rejutem nung Khristan yimsü temaitsütem agienang ta tetuyuba agütsür aser district aika nung nungdaksü makaba nung police-i Khristantem mita aoer, ta metetdaksü.

Police-i Karbi Anglong, Dima Hasao aser Goalpara densema tesem aika nung Khristantem mita aoba ajanga Khristantem tsübudaksür. Talisa state nung Assam Magical Healing (Prevention and Evil Practices) Act 2024 ozüng benokba sülen Khristantem atema tensa ano tamajungba dang kümogo.

Khristantem aser Khristan lenirtem anema inyaksü atema tim masüba nung Assam Magical Healing (Prevention and Evil Practices) Act 2024 ozüng amshir, ta ACF-i metetdaksü.

Taküm February nung Assam assembly nung BJP-i aniba sorkari agizükba ozüng kübok aibelenertem küm 3 tashi tepuokdak ayutsüa akok aser senchi 50,000 tashi achitsü.

ACF-isa, Arogo nung lenirtem aser tamangertemi shirangertem atema sarasademtsüba mesüra sensakertermi shisaliok tsütsü

yariba atema iba ozüng kübok Khristantem nem tai tongloksür, ta metetdaksü.

Tawa Golaghat district nung Khristan, Pranjal Bhuyan-i sayatenya agi aneptsüba benshia Hindu nungertem Khristan yimsü dangi meyipdaksütsü merang, ta tai tongloksü police-i pa apuba sülen tang tashi judicial ket nung lir.

Allen Brooks-i, "Shilem lemsar item ama tatalokbatem bulua akümba atema onoki tebilemstü akar. Yimsü dak sendakba temaitsütem agienang ta kenü anogo tuyur, ano kenü anogobo shirangertem atema sarasademtsüba atema-a apur. Magical Healing Act ya nukjidong yur latetba ozüng lir, testüba putu aika Khristantem benshibatem ya ozüng alema inyakba, ta küm daksütsü atema iba ozüng ya hadir ka ama amshir," ta metetdaksü.

Paisa, "Onok (Khristantem) indang shisaliok rejutem nung onoki kaketsür 50,000 tenzük aser Assam tesem aika nung healthcare facilities lapoka lir, ajisüaka tangbo Khristantem sarasademtsü atema-a tanaben bilemdangtsüba akümer. Iba ya politics masü saka ozü yimsü kecha tetsübu makai benshitsü temeden indang onük ka lir," ta ashi.

ACF-isa, tawa Haflong nung Vishwa Hindu Parishad (VHP) lenir kati, tribal nütüng aliba tesemtem nung temesepba mozü shibelenba nung Arogoi shilem agir ta tai tongloksüba atema jashiba metetdaksüogo.

Allen Brooks-i, Assam nung Khristantem shisaliok, healthcare, media, literature aser loktiliba densema sector aika tongti shilem agia linük yangerba nung yarir, ajisüaka yimsü nung ajemdaker Khristantem anema inyaker, ta metetdaksü.

AO OSHI ANGAZÜKDAK:

TANÜ ANGAZÜKTSÜBA OJANG

Tasüba

(n) taküm tatembang akümba (death)

* Nisung shingai tasüba maginer.

Tasümang

(n) tasüba temang, temang tasü (corpse, dead body)

* Asenokibo tasümang kanga akhümtsüba amshir.



OLONG PAITEP # 6998

Grid for crossword puzzle #6998 with numbers 1-15.

TIPILEN

- 1. Balaka - (5)
6. Aika shirangba - (4)
7. Tar tatsü - (6)
9. Nenü'er jabaso - (4)
10. Sen latettsüba - (7)
11. Tangar kübok alir - (4)
14. Lon nung inokba - (6)
15. Tzü ayimdak - (4)
16. Ajok - (5)

LANGTSÜNGLEN

- 2. Hai sür inyak - (4)
3. Aor tenüng ka - (6)
4. Ali telungi talangka lur - (5)
5. Tebang kenyongi mazüoker - (4)
8. Ken atema anenzükertem - (5)
9. Toktepa noktak - (5)
10. Sen - (6)
11. Benjong agi - (5)
12. Telung nung rizünga ayu - (4)
13. Tebang nung enok - (4)

OLONG PAITEP # 6997 TELANGZÜBA

TIPILEN :

- 1. Pakti, 6. Temeim, 7. Suyim,
8. Sadem, 10. Anüngdang,
16. Manga, 17. Nüji, 18. Kanga.

LANGTSÜNGLEN :

- 2. Aosu, 3. Tiyazü, 4. Benden,
5. Lepma, 9. Agi, 11. Nüngja,
12. Ajunga, 13. Alang,
15. Tang.

NAI-A YA METETTER MA



Alima nung nüngtugu pop kentener Ed Sheeran-i February 12, 2025 nü JN Stadium, Shillong nung shilem agitsü renema lir aser iba kenten sentong atema ticket ya December 9 nü nungi entertainment platform BookMyShow nung ayok tenzüksü. '+---x India Tour 2025 nung shilem ka ama pai Shillong nung shilem agitsü. Mathematics Tour mapang Sheeran-i India nung yimti trok nung shilem agitsü aser Bhutan, Qatar aser Bahrain nunga shilem agitsü. Kenten sentongtem atema ticket sen 3000 nungi tenzüka angutsü. India nunge mezüngbuba show January 30 nü tenzüksü aser February 15 nü tembangtsü. Yash Lawns, Pune nung January 30 nü, Ramoji Film city, Hyderabad nung February 2 nü, YMCA Grounds, Chennai nung February 5 nü, NICE Grounds, Bengaluru nung February 8 nü aser February 12 nü Shillong nung pai shilem agitsü. Tatemsa pa February 15 nü Leisure Valley Ground, Delhi nung shilem agitsü.

Manipur: Police station & MLA'er ki amakba atema nisung 8 apu

Imphal, Yimpöksüi/ November 30 (Agencies): Manipur nung police station ka aser Members of the Legislative Assembly (MLAs) ka ki amakba nung densema aliba atema police-i nisung ti puogo.

Nisung tiprongla ya Brehostibarnü pua liasü, ta police temi Honibarnü metetdaksü.

Pua alirtem rongnung Imphal West district nung Patsoi police station kübok

Kiyam Mamang Leikai nung alir arishi küm 20 tain Chongtham Thoicha-a densema lir.

Thoicha ya November 16 nü longkak aitba mapang local MLA'er ki amakba nung densema aliba atema aija puogo.

Kasa mapang nung November 27 nü Kakching police station aser sepaitem amakba atema tangar nisung tenet puogo.

November 16 nü kasa

MLA'er ki maka raksatsüba atema nisung pezü pua aliba chiochtsü khanga longkak aitba mapang ano parnok yagi iba police station maka liasü.

Manipur nung kin ana mangatetep adoker tang tensa mejungi aliba mapang item nisungtem ya puogo. Taoba küm May ita nungi tang tashi nung iba azütokshi lendong nung nisung 250 dak tema süogo aser nisung meyirejang aika pei talidak ki makai kümogo.

Mizoram nung Bangladesh nunger refugee tem anidentsü

Aizawl, Yimpöksüi/ November 30 (Agencies): South Mizoram nung Lawngtlai district kübok yimtsüng balala nung jenoker aliba Bangladesh nunger 2000 dak tema kasa district kübok yimtsüng pezü nung dang lidaktsütsü Mizoram sorkari sentong yangludat.

Chief minister indang political adviser Lalmuanpuia Punte, shiba refugee tem tanga tesem kati anir aotsü atema bushisüngdangba committee tekolakba lir, pai ashiba agi, committee-i parnok lidaktsütsü asoshi shimmer aliba tesem asadanga mapang ka lir.

Pai, sorkari Bangladesh nungertem ya yimtsüng balala nung prokshia metoktsüi Bangladesh den arrtsü anasa Lawngtlai district kübok

yimtsüng pezü nung külemi lidaktsütsü sentong yangludat, ta ashi.

Inyakyim nung tetsükdaktsü madoki tayongba inyaksü aser humanitarian teyari balala tajungba agütsütsü aser Bangladesh nungertem peisasa aayanga lidaktsütsü atema parnok tanga tesemi anir aotsü sentong yangludat, ta pai ashi.

State home department sangdong ka ajanga ashiba agi, Chittagong Hill Tracts (CHT) nungi timba sür Bangladesh nunger 2,014 tang Lawngtlai district nung jenoka lir. Iba district ya Bangladesh aser Myanmar na den arrtsü nung lir.

Punte, shiba Zoram People's Movement (ZPM) MLA ka lir, pa ashiba agi, refugee tem mashi mashi

mamenokdaktsütsü aser parnoki onüleni meyoktsü atema guideline tapet yanglutsü nüngdaker ta sorkari bilemer.

Kasa mapang nung Myanmar aser Manipur nungi jena arur alirtem shirnok state kübok tesem balala nung jenoka lir, parnok dak sendakba nung pai ashiba agi, parnok tanga tesemi anintsü atema tang tashi nungbo kecha sentong mali, kechiyong Myanmar aser Mizoram nung tensa tajungba akümba sülen parnok takaratiba nung pei yimtsüngi aotsü imlar.

Bangladesh nunger dak alaka Mizoram nung Myanmar nunger 33,023 aser Manipur nungi nisung 7,118 jenoka lir, ta home department-i metetdaksüogo.

Meghalaya: Umroi Airport ken o bentettsü VPP MP-i mepeshi

Shillong, Yimpöksüi/ November 30 (Agencies): Voice of the People Party (VPP) MP, Ricky Andrew J Syngkon-i, Meghalaya nung Umroi Airport atsülangshitsü atema tetsükdaktsü alibatem bentettsü asoshi lenmang bushitsü atema industry mongintem densema neutral committee ka tentettsü maneni khangogo.

Civil Aviation Minister Kinjarapu Rammohan Naidu dangi züluba shiti ka nung Syngkon-i ashiba agi, Meghalaya nung airport ka kija aliba ya atsülangshitsü atema sentong kanga junga yanglur benoka inyaksüla.

Paisa, tetsükdaktsü liaka Shillong Airport nungi mid-



Ricky Andrew J Syngkon

size tayimtsütem inyaksangshi sütettsü ta Meghalaya High Court-i ashiba shisema liasü.

Syngkon-i, tang aliba

runway indang limitations tem metetdaksü koba ajanga ATR-72 aser Bombardier Q-400 amala tayimtsütem nung khu tali abenba atema merenshitsüsa akümer aser iba ajanga parnok inyaksangshi nung kongshir, ta ashi.

Pai, tayimtsü tulutem atema airport atsülangshiba mapang item ajak ya temulungdang ayutsü koda tongtibang iba indang lemsatapa liasü.

Maneni MP-i, runway atsülangtsü atema ali acre 22 alisemtsü asoshi benoka aliba ya süoki ia bilemba lemsatepogo, kechiyong Meghalaya nung land ownership system balaka asüba ajanga ali alizüktsü kanga tasak lir, ta ashi.

Manipur nung NIA-i tatalokba asem bushisüngdang

Guwahati, November 30, 2024 (Agencies): Manipur nung tawa ozüng alema inyaksangshiba tatalokba asem National Investigation Agency (NIA)-i bushisüngdangtsü tenzükogo.

Union Ministry of Home Affairs-i agütsüba sülen NIA-i November 13, 2024 nü ken o tem tanaben benokogo.

Ken o asem ya Borobekra lendong, November 11 CRPF amakba aser November 7 tashiyim agi shi nung medemba

aser tepsetbatem lir.

November 11, 2024 nü mejangjatetba telungpurtemi Borobekra Police Station nung injang khaloktsü, ki o dokan kar rongdoktsü aser civilian ana khaset.

Iba sülen tetsür asem aser tanur asem pur ao aser tepset.

Ano, November 11 nü telungpurtemi Jakuradhor Karong nung CRPF post aser Borobekra police station amak.

Iba mapang CRPF constable ka yiru aser

mejangjatetba telungpurtem tasümgangtem den prangpong-injangtem angu.

November 7, 2024 nü Jiribram nung telungpurtemi tetsür ka khaset. Jairolpokpi (Zairawn) nungi Ngurthansang kinungtsü Zosangkim (31 years) dak tashiyim agi shi nung medem aser mi agi rongset.

NIA teloktemi November 21 aser 22 anogotem lendong atalokba tesemtem sendangogo aser bushisüngdang tenzü.

Linük kümzuka ayutsü Russia temeden lir: Kim



North Korea sorkari lemsatepba noksa nung North Korea lenir Kim Jong Un (tabelen) aser Russian Defense Minister Andrei Belousov na North Korea yimtiba Pyongyang nung Hokolbarnü senden amenba mapang tangokba noksa nung angur.

Pyongyang, Yimpoksüi/ November 30 (Agencies):

Russian defence minister den senden amenba mapang Ukraine den rara nung Russia masetshi-i pusemba North Korea lenir Kim-i nenshia metetdaksüba den Moscow den military tesendaktep akangshitsü atema mulunga agizükogo.

Kim Jong Un-i ashiba agi, Ukraine-i long-range missile tem amshiba ya United States-i military dak sendakba nung indang indanga shilem agiba lir aser linük kümzuka ayutsü atema Russia temeden lir, ta official Korean Central News Agency (KCNA)-i Honibarnü sangdong ka ajanga metetdaksü.

Mapa toktsütsü aliba US tir Joe Biden-i iba ita Ukraine nem US-i agütsüba long-range Army Tactical Missile Systems (ATACMS) tem Russia dak khaloktsütsü atema amshitsü temelaba agütsüogo.

Hokolbarnü Pyongyang nung Russian Minister of Defence Andrei Belousov agizüka senden amenba mapang Kim-i, Russia Federation-i imperialist tem nungi parnok sovereignty aser

litsü kümzuka ayutsü atema policy balala benoka inyakba par linüki pusemstü ta shiogo, ta KCNA-isa metetdaksü.

Russia aser North Korea na tawa military dak sendakba nung tesendaktep kanga akangshiogo aser Pyongyang-i Ukraine den rara nung Russia nem teyari agütsütsü asoshi sepai meyirejang aika yokogo.

Hokolbarnü senden amenba mapang Kim aser Belousov nati linük ana tsüingda strategic partnership akangshitsü atema mulungtepogo.

Russia-i Ukraine amakba North Korea-i pusema aruogo aser ashiba agi, iba jenjang agiba ya NATO anütokleni atsülanga aoba aser US-i anir Russia jenjang raksatsütsü merangba anema nokdakba ka lir.

Kim-isa, US-i Ukraine nem Russia telung nung tesem balala amaktsü atema long range missile tem amshitsü asoshi temelaba agütsüba ya aitsüogo, aser iba ya rara nung indang indanga shilem agiba ka ta ashiba den Washington-i Russia anema jenjang agiba ajanga rara atsülangdaksütsü aser iba ajanga meimchir ajak amokmerener, ta shisem.

Russia-i tawa Ukraine

amakba ya Russia tamendakdak sayutsü atema mapang shitak nung jenjang tapet agiba ka lir, ta Kim-i shisem.

NATO, US, Ukraine aser South Korea nungeri asadangba sülen North Korea-i Russia dangi sepai 10,000 dak tema yoker alitsü aser parnok karbo rara nung shilem agi tenzüker alitsü ta asatetogo.

Parnokisa, North Korea-isa artillery system, missile aser tanga prangbong injang aser hadirtem tem Russia agütsüogo, ta ashi.

North Korea nunger sepaitem Russia tenüing nungi raraba indang North Korea aser Russia napronglai tang tashi nung kecha osang agüja mali aser linük anaprongla yagi prangbong injang agütsüba osang ya tai ta shia arudar.

North Korea-i item teyari agütsüba melena Russia-i North nem advanced weapons technology tem agütsütsü akok, kong nuclear missile tesashiba yanglutsü atema teyari agütsüba densema alitsü akok, ta South Korea, US aser parnok den sendaktepa aliba linüktemi shisabulua bilemer.

Taoba hopta South Korea national security adviser Shin Won-sik-i local SBS TV dang ashiba agi, Russia-i North Korea nem air defence missile systems agütsüogo.

Pai ashiba agi, Moscow-i Pyongyang nem senotsü aser tanga military technology balala agütsür alitsü ama reprangteter, kong space-based surveillance system ka yanglutsü atema North-i merangdanga aruba nung tenüingdakattem densema alitsü imlar.

June ita Kim aser Putin nati, linük ana rongnung ka danga tsükchiri makra iba mapang military teyari agütsüteptsü asoshi nangzüktepogo.

Iba tenangzüktepba ya Cold War tembangba sülen linük ana tsüingda defence tenangzüktepba yangluba nung tulutiba ama züingshir.

US-i Taiwan dang USD million 385 alang prangbong injang ayoktsü

Washington, Yimpoksüi/ November 30 (Agencies): United States-i Taiwan dang USD million 385 alang prangbong injang aser hadir balala ayoktsü atema tenangzüktepba ka yangluogo. Iba tenangzüktepba yangluba ajanga linük ana tsüingda tesendaktep akangshiba sayur.

US-i, fighter jets aser radar systems indang spare parts tem densema tanga military hadirtem ya 2025 küm nungi agütsü tenzüksü imlar, ta US Defense Security Cooperation Agency (DSCA)-i Hokolbarnü sangdong ka ajanga metetdaksü.

US Department of State-i item hadirtem ayoktsü atema temelaba agütsüba ajanga parnok indang F-16 fleet tang aser tarutsü atema renema atatsü asoshi Taiwan nem teyari agütsütsü, ta DSCA-i ashi.

Honibarnü Taiwan tir William Lai Ching, Pacific-i trip ka atema apusogo aser US nung anenzüksü sentong lir, koba China-i kanga ashishia arudar.

China-i iba asetkong ya parnok meyong, aser nüngdak dang süra tashiyim amshia iba linük atsüingtsü ta shiogo. US-i Taiwan dang prangbong injang aser hadir balala ayokba ya ashishia arudar.

Honibarnü Pacific nung parnok den sendaktepaba aliba Marshall Islands, Tuvalu aser Palau-i apusoa aoba mapang Lai-i, US indang state Hawaii nung anenzüksü.

Linük toktsür mao tsüingda o tatsüka jembiba mapang Lai-i, iba tour ya values-based democracy asoshi putu tasen ka asütsü ta ashiba den US sorkari iba trip kecha tetsükdaksü makai aotsü atema teyari agütsüba atema pelaba lemsatepa laisü.

China indang Ministry of Foreign Affairs-i, Taiwan lenir-i US semdangba ya parnoki anemer ta shiogo. Formal diplomatic tesendaktep meliaka US ya Taiwan nem prangbong injang agütsür tulutiba lir.

US-i, Taiwan ken o ya kanga kümdanga achayangtsüla, Taiwan-i nüjisong atema nokdakba anemtsüla aser China yimjung nung longjemdaksütsü asoshi pusemstüla, ta ministry otongdar Mao Ning-i ashi.

US tir Joe Biden yimsüsüba mapang tang agi prangong injang agütsütsü aser alizüksü atema 18benbuba tenangzüktepba yangluogo, ta Taiwan-i ashi.

Taoba ita US-i, Taiwan atema \$2bn arms sale package ka agizüka liasü, kong advanced surface-to-air missile systems aser radar densema liasü.

Taipei nung Ministry of National Defense-i, prangbong injang aser hadir balala agütsüba atema pelaba lemsatepogo aser ashiba agi, China-i parnok nongshiba mapang parnok military tashi itshitsü atema parnok mulungteter lir.

Pakistan nung kiralongrar 17 tepset



Islambad, Yimpoksüi/ November 30 (Agencies): Pakistan kübok Khyber Pakhtunkhwa province nung security forces-i Hokolbarnü helicopter amshia kiralongrar jenoka aliba tesem balala amakba sülen kiralongrar 17 tepsetogo.

Itangitertemi osang agütsüba dak ajemdaker Bannu aser North Waziristan district nung tesem balala meita aoba sentong ayongzüka agia liasü, ta security source-i metetdaksü.

Bannu district kübok Baka Khel tesem nung military-i chopper tem amshia kiralongrar tem jenoka aliba tesem amakba mapang Hafiz Gulbadur telok den sendaktepa aliba kiralongrar 12 tepseta liasü.

Tanabuba meita aoba

sentong ya North Waziristan nung Mir Ali kübok Hasso Khel tesem nung ayongzüka agia liasü aser iba mapang kiralongrar pongu tepsetogo.

Telungpur ket nungi prangbong aser injang aika ngutetogo, ta source-isa ashi. Security forces-isa, parnoki tepsetba kiralongrartem indang noksa sayaogo.

Meita aoba sentong maneni benoka inyakdar aser security forces inyakyim akangshidaksütsü atema sepai talila yokogo.

Khyber Pakhtunkhwa kübok south len aliba district tem nung tawa kiralongrartemi security forces tem amakba anema security forces-i meita aoba sentong ka ayongzüker agia arudar.



Colombo: November 22 nü nungi tenzüka Sri Lanka nung tzüinglu dak sendakba lendong balala agi nisung 463,000 tema dak kongshiogo, ta linük Disaster Management Center (DMC)-i metetdaksü. Administrative districts 25 nungi 24 nung kibong 138, 191 nungi nisung 463,569 tzümetsüing, süngtong laoba, mopung tesashi aser anentsüh agi kongshir lir ta DMC-isa metetdaksü. DMC-isa, nisung 15 asüba, nisung 20 yiruba aser ka samara bushia aliba metetdaksüogo.

Nistelrooy Leicester head coach kümogo



Ruud van Nistelrooy

Yimpoksüi/November 30, 2024 (Agencies): Manchester United nung interim coach amaka takok ngua inyakba sülen Leicester City-i, Hokolbarnü Ruud van Nistelrooy parnok coach asütsü shimogo.

Arishi küm 48 tain van Nistelrooy-i 2027 küm June ita tashi inyaksü atema tenangzüktepba yangluogo aser tang pai English Premier League nung ponglangen nungi züngyonga atu nung pongububa jenjang nung aliba team ya achaayang tenzüksü.

Nistelrooy ya asaya aliba mapang Man United aser Real Madrid nungi asayaogo. Pa July ita Erik ten Hag kübok United indang coaching staff nung dena liasü. Ten Hag taoba ita mapa nungi anentsüba sülen Van Nistelrooy khen atema United coach mapa bena liasü aser iba akok aser ka draw süa liasü. Iba sülen United-i Ten Hag melena Ruben Amorim shimogo.

Nistelrooy lenisüba nung United-i takok anguba rongnung English League Cup nung Leicester pur goal 5-2 agi

akokba aser Premier League nunga Foxes pur goal 3-0 agi akokba densema lir.

"Ni kanga nema adanger aser kanga pelar. Ni Leicester indang jembirtem ajaki iba club indang kanga jangrabangra jembio," ta Van Nistelrooy-i ashi.

PSV Eindhoven nung coach mapa inyakba sülen Nistelrooy tang agi tanabenbuba senior team manager mapa inyaksü lir. Pa lenisüba nung PSV Eindhoven puri Dutch Cup akok, saka 2022-23 season tembangba sülen pai club toktsü.

"Ruud tajangshiba aser shisatsü aser asaya akoktsü atema bilema inyakba ajanga onok kanga ajangzükdaktsü," ta Leicester mendenbuba Aiyawatt Srivaddhanaprabha-i ashi. "Onok fan tem aser club asoshi takok tajung bener arutsütsü asoshi pa nongita yaritsü yongya atar," ta paisa shisem.

Leicester-i taoba hopta coach Steve Cooper mapa nungi anentsüogo. League asaya 12 nungi asaya ana dang akokba sülen pa mapa nungi anenja liasü. Ajisüaka Honibarnü asayabo Nistelrooy lenisüba nung masü saka first-team coach Ben Dawson lenisüba nung asayaogo.

Iga Swiatek nem ita ka atema tenokdangba agütsü

Yimpoksüi/November 30, 2024 (Agencies): World number two Iga Swiatek-i, tenokdangba agütsür aliba mozü achiba atema la nem ita ka atema tenokdangba agütsüba agizükogo, ta International Tennis Integrity Agency (ITIA)-i metetdaksü.

Arishi küm 23 tain Swiatek dak 2024 küm August ita temulungjang mozü trimetazidine (TMZ) puteta liasü. Iba mapang nung Poland tsürla ya world number one asayar liasü.

Ajisüaka ITIA-i, Poland nung yanglua ayokba non-prescription medication (melatonin) ka menenba ajanga adokba lir ta agizükogo, koba asayar yagi jet lag aser junga memejangtetba atema chia liasü.

"Anungji lai asa aibelenba masü. Asayar-i aibelen menaba jenjang ya kanga ajemer aser 'No Significant Fault or Negligence' range nung lir," ta ITIA-i ashi.

Taoba French Open koker alila Swiatek, shibai Grand Slam kija asaya pongu koka lir, lai la nem tenokdangba agütsüba agizükogo.

"Kü nem temelaba agütsüogo anungji nenok den ni kü taküm nung tajangshiba tamajungtiba indang



Iga Swiatek

lemsateper," ta Swiatek-i social media nung post ka ajanga ashi.

"Taoba ita ana ser tesimalang ni ITIA inyakyim kübok liasü aser iba ajanga ni aibelenba maliba kuli agütsüogo.

"Kü indang career nung tang mezüngbuba doping test positive liasü aser ni kodanga mangashidangba mozü ka kanga ajema aliba sayuogo, aser iba ajanga ni taküm tepeyong kanga meranga inyaka aruba ya ashishia liasü.

"Ni aser ozü team kanga animesüngzükteti aruogo. Tang ajak kanga junga rasa shiogo aser merek mereka ni miemba asaya tanaben asayatetsü," ta lai ashi.

Swiatek nem September 22 nungi October 4 nü tashi

tenokdangba agütsü aser iba mapang la asayamung asem nung shilem magitet.

Laisa, Cincinnati Open nung anguba senpet meyipa agütsüogo, kong lai final nung Aryna Sabalenka mekoki liasü.

"Ni taoba mapang dang nungi tashi taitba asütsü. Iba ken o tembangba atema kanga anisüngzüker," ta Swiatek-i ashi.

ITIA-i ashiba agi, Swiatek dak tenokdangba agütsür aliba mozü putetba ya temzüng ozüng dak ajemdaker mezüngbo nüburttem nem memetdaksü, kechiyong lai la nem provisional suspension agütsüba atakzükja aliba mapang nung appeal asü aser iba ya agintsüogo.

NSL nung asayatsü atema NOC meshitsüla: K DFA

Kohima, Yimpoksüi/November 30 (TYO): Kohima District Football Association (K DFA)-i sangdong ka ajanga, K DFA kübok züngoksema aliba asayartem shirnoksa taruba Nagaland Super League (NSL) nung asayatsü sentong lir, parnok dang association nungi No Objection Certificate (NOC) agizüktsü metetdaksüogo.

K DFA-isa, asayar shirnokisa NOC memeshilir parnok anema temzüng ozüng dak ajemdaker jenjang tapet agitsü, ta metetdaksüogo.

Syed Modi International: PV Sindhu final-i iogo

Yimpoksüi/November 30, 2024 (Agencies): Olympic nung medal ana tashi ngur alila PV Sindhu-i Honibarnü tang asaya aliba Syed Modi International Super 300 badminton tournament nung külem India tsür Unnati Hooda straight-game nung koka final tongtetogo.

Top seed Sindhu-i, arishi küm 17 tain Hooda ya 21-12 21-9 agi minute 36 nung dang koka liasü.

Hooda-i Sindhu nem timtem agüja masayatet aser unforced errors aika menaba ajanga tamako ngua liasü.

"Tanü kanga junga asayatetba atema pelar. Ni tetenzük nungi tejakdang sür asaya. Ni asayaba yimya dak temulunglemteta liasü," ta Sindhu-i ashi.

"Unnati-i takokba tashi tajungtiba asayaogo, saka ni pa nem ni ajateta atutsü atema

Association-i ashiba agi, parnok kübok aliba asayartem ajak NOC ya kechi südir süaka meshitsüla.

Maneni K DFA-i, Nagaland Football Association (NFA) aser NSL team tem dang league asayaba mapang local coach tem anisema parnok ajungsemotsü aser ajungkettsü mepeshia metetdaksüogo. Iba janga parnok nem tajangshiba tajung agütsüba dang masü saka Nagaland nung football asaya terenlok nung teyari tulu agütsütsü.

maongka magütsü. Ni tetenzük nungi tatem tashi tejakdang liasü. La lanur asayar tajung ka lir aser kanga junga asayayonga aotsü imlaja atar," ta laisa shisem.

Sindhu-i iba asayamung ya taoba mapang aneben koker lir aser la final nung Thailand tsür Lalinrat Chaiwan mesüra China tsür Wu Luo Yu den asayatsü.

Tarep temeyoktep asaya nung Tanisha Crasto aser Dhruv Kapila nati China nung tarep Zhi Hong Zhou aser Jia Yi Yang na straight-game nung koka final-i iogo.

Fifth-seeded India nung tarep yagi semifinal asaya ya 21-16, 21-15 agi minute 42 nung koka liasü. Tena China nung tarep Pin Yi Liao aser Ke Xin Huang na mesüra Thailand nung tarep Dechapol Puavaranukroh aser Supissara Paewsampran na den asayatsü.

Kane Williamson-i otsü tasen ka yangluogo

Yimpoksüi/November 30, 2024 (Agencies): New Zealand nung nungntugu asayar Kane Williamson-i Honibarnü otsü tasen ka yanglua pa par linük nungi batter tem rongnung Test asaya nung run 9000 yangluba mezüngbuba asayar kümogo.

Williamson-i iba otsü tasen ya New Zealand aser England na Hagley Oval, Christchurch nung mezüngbuba Test asaya tasemnübuba nung yanglua liasü.

Taoba captain, shiba India den asayaba mapang groin yiruba ajanga masayai lir tang asaya tenzükogo, pai iba alizüng ya New Zealand pur tanabuba innings nung tongteta liasü. Pai run 61 yanglu.

Arishi küm 34 tain Williamson-i Test asaya 103 nung iba alizüng tongtetogo aser pa ya Kumar Sangakkara aser Younis Khan na den külemi iba alizüng tongtetertem rongnung tasembuba lir.

Australia nung asayar Steve Smith-i Test asaya 99 nung run 9000 yanglua pai ajak dang takaratiba iba alizüng tongtet aser pa sülen tanabuba jenjang nung asayar tejen Brian Lara lir, shibai Test asaya 101 nung iba alizüng tongteta liasü.

Test asaya nung New Zealand nung batter tem rongnung Ross Taylor (7,683) tanabuba jenjang nung lir. Tasembuba jenjang nung Stephen Fleming lir, shibai run 7172 yanglua liasü.

Tanabuba innings nung Williamson-i run 61 yanglu. Pai Rachin Ravindra aser Daryl Mitchell na den kanga dang tongtibang partnership yanglua liasü, saka pa Chris Woakes-i out sütsü.

Mezüngbuba innings nung pai run 93 yanglua New Zealand team-i run 348 yangluba nung teyari agüja liasü. Glenn Phillips-ia run 58 yanglu aser kasa mapang nung England nung bowlers Brydon Carse aser Shoaib Bashir nati mezüngbuba innings nung wicket pezüzü agia liasü.

Mezüngbuba innings nung England team-i kanga junga asaya-a Harry Brook-i run 171, Ben Stokes-i 80, aser Ollie Pope-i 77 yanglua parnok ajak senteper run 499 yanglu aser parnok run 151 agi tejakdang aküm.

Tasemnübuba nung New Zealand-i run 155 dang yanglutet parnok run 4 agi tejakdang sür anogo tembangogo.

BILEMDANGANG

"Nisung ajakibo na asoshi tajung bilema minyaktsü."